

四庫全書

集部

欽定四庫全書

集部

愚菴小集卷七

詳校官庶吉士臣汪彥博

助教臣常循覆勘

總校官庶吉士臣何思鈞

校對官中書臣田尹衡

謄錄監生臣張鈞

欽定四庫全書

愚菴小集卷七

吳江朱鶴齡撰

序一

毛詩通義序

詩之為道以依永而宣苑結以微辭而託諷諭此非可
以章句訓詁求也章句割詁之不足以言詩為性情不
存焉然而古人專家之學代有師承又非可鑿空而為

之說漢唐以來詩家悉宗小序鄭夾漈始著辨妄朱紫陽從之掊擊不遺餘力集傳行而詩序幾與趙賓之易張霸之書同廢雖然烏可廢也古人之書卷末多繫以序孔安國遷古文書序於各篇之首王弼遷易象象爻辭于各卦之中毛公取詩序移置詩首亦猶是也序之出于孔子子夏出于國史與出于毛公衛宏雖無可考然自成周至春秋數百年間陳之太師肄之樂工教之國子其說必有所自來大約首句為詩根柢以下則推

而行之推行者間出于漢儒首句則最古不易觀于六
亡詩之序止系以一言則後序多漢儒所益明矣觀于
毛公之傳宛丘不同于序說則首句非毛公所為亦明
矣序之文既最古毛傳復稱簡畧無所發明鄭康成以
三禮之學箋詩或牽經以配序或泥序以傳經或贅詞
曲說以增乎經與序所未有支離膠固舉詩人言前之
指言外之意而盡汨亂之孔仲達疏義又依回兩家無
以辨其得失則夫紫陽集傳之出大掃蒙翳而與以廓

清此亦勢有必至也雖然毛鄭可黜而序不可黜點序則無以為說詩之根柢不得不循文揣義斷以臆解較之漢唐諸儒雖明簡近情而詩人之微文奧旨已不可復識此何異寫生者取雲孫之聲咳形容而追貌其祖先之面目又何異聽訟者去當時之契券証驗而冥決以後代之爰書求其不熈必無幸矣吾所謂鑿空之說不可以言詩者此也雖然序果一一可信乎曰國風三頌舍序其無詩矣惟是楚茨信南山至采芣隰桑諸詩

皆正雅也而序以為刺幽衛武之抑幽王世詩也而序
以為刺厲凡若此類實難免于學者之疑吾以謂有不
足疑者孔子時去周公將五百年太史掌記未亡矇瞍
律呂未失賢人君子弦誦未絕也雅頌猶殘闕失次反
魯始克正之况經戰國之雲擾秦政之燔滅楚漢之龍
戰虎鬪能保無簡編之淆亂者哉書藏魯壁猶亡佚居
半三百篇特存于小儒曲學佔畢諷誦之流傳何獨能
一無訛舛孔刪如故哉吾則以楚茨諸篇定屬錯簡序

已非當時之舊此又深有賴于紫陽之是正者也語云
冢尺雖斷可定鍾律序為詩之冢尺也尚矣一汨于康
成之膠滯再汨於紫陽之斥排將聖人所謂主文譎諫
厚人倫美教化以至於動天地感鬼神者其終晦昧湮
沒而不可求已乎余不敏竊主古義而參諸冢于序之
不可易而可信者為疏明之其抵牾不可信者則詳辨
之要以審定可否綜覈異同使積蔽羣疑渙若氷釋庶
通經之一助云爾抑觀東萊詩記所載朱氏云云皆奉

古序為金科黃東發引晦菴新說亦多從序然則廢序
言詩特過信夾祭之故初非紫陽本指乎吾不敢以紫
陽之詩有殊于孔氏之詩又不敢以孔氏之詩而格夫
紫陽之詩也故參伍羣說以折其衷焉世之學者其毋
以余為輸攻紫陽斯可矣

姚文初曰小序亦有難通處呂成公尊信太過
朱子所以辭而闢之必如長孺之論方為無弊

禹貢長箋序

神禹功高百王維夫子之稱之者曰盡力乎溝洫而子

輿氏則云莫不善于貢夫所云不善者必其後世子孫
奉行之失所云盡力溝洫則任土作貢是也考禹制貢
之法兼行井牧實可治千萬世而無弊今夫天下之大
患孰有過于漕渠咀咽閭殫為河疏濬塞但成空談者
乎又孰有過于中原土曠彌望蒿萊竭東南一隅以養
西北者乎又孰有過于小民骨折髓枯梯航萬里而司
農輒告匱者乎又孰有過于賦役無準吏緣為姦額日
廣而蠹日叢者乎凡此皆禹經畫所及一一深憂熟計

於千載之上者也今觀禹貢一書甸服有粟米之輸則
貢篚不及也八州之賦止以供五服諸侯之租稅而天
子不煩挽漕也土貢雖及八州五服諸侯即以所賦易
之民不滋擾也甸法通於天下軍政藏焉養兵無絲粒
費也灌溉廣而樹藝勤高者雍梁卑者揚兗不聞土滿
人滿之患也舉後世之曰積貯曰屯營曰進奉曰和買
曰勸借曰封樁曰瓊林大盈之類聖人無不以身為之
救而以法為之維嗚呼此禹之所以功高百王者乎或

者謂洛洞既平九州繁阜即賓貢玉食惟王不會亦何
害焉是不然禹蓋以一人勞天下非以天下奉一人者
也荆揚財賦擅天下大半夫豈不逆知而其著之書曰
土塗泥也田下下也土貢必謹誌所產遷其地而弗為
良也九等之賦有錯出以寬之不罄地之毛也使後之
人讀之而喟然曰以彼其躬平洛洞如此利盡九州如
此猶且恐恐然嗟嗟然甘監門臣虜之養而不恤者何
為也庶幾賓貢玉食不至為徵山賦海者之所藉口乎

此吾所謂後世末流之弊無不以身救之而以法維之者也或者又謂堯之為君也茅茨土簋敝履鹿裘樸畧焉而已及至禹而海錯橘柚有貢金銀有貢珠璣玉石有貢不幾為漢唐之誅耐金遞荔支者觴濫乎是又不然夫風會日趨于奢而過損必激為汰宋孝武見高祖牀頭土障壁上葛燈籠麻繩拂笑曰田舍翁得此亦過矣後世人主安知不笑茅茨土簋敝履鹿裘為陶唐一田舍翁哉是故雕璣玩好吾不禁人主之所欲而但著

為則焉使之不責有於所無不悉索以為富如是已爾
若夫世變日新無藝之征疊加而未已斯固聖人之所
深憂熟計而無可如何者也非其法之止可治一時不
可以治千萬世也古今諸儒注此篇者不下二十家互
有異同舛錯不少余甲申歲讀書金陵瓦官寺竊網羅
諸說會粹一編謂厥賦貞當是下下之轉東迤北會于
滙當是為滙之訛間以質之閩漳何玄子先生先生躍
然印可時先生方著春秋比事屬詞未及尚書遂命余

卒成之藏度敝篋已踰二紀頃乘暇日重加釐訂賦稅
河渠自神禹至今三千餘年之利害得失約畧如指掌
以至山川都會地理水利之屬凡經文所有者無不博
考而詳辨焉斯固經國之先資救時之良砭也百世而
下苟能師神禹之意而用之斯民其有瘳乎

尚書埤傳序

六經之學非訓詁不明然有訓詁不能無異同有異同
不能無踳駁他經皆然尚書為甚蓋尚書者帝王之心

法治法所總而萃也後世大典章大政事儒者朝堂集
議多引尚書之文為斷據義解一訛貽害非尠如誤解
用牲于郊牛二而世遂有主合祭天地及南郊北郊之
說者矣誤解九族與罪人以族遂有旁及母族妻族而
坐之者矣誤解桐宮居憂復子明辟而世遂以放君負
扈真為伊周之事矣誤解金作贖刑始以黃金易黃鐵
矣誤解臣妾逋逃始以婦女從軍矣誤以洪範五行牽
合庶徵福極而介甫反之遂謂天變不足畏矣誤以弗

辟為致辟居東為東征而公孫碩膚之美不白矣誤解
弱水在條支崑崙即河源及書序成王伐東夷而漢武
之窮兵西北隋唐之越海征遼東皆不足戒矣嗟乎傳
書豈易言哉百篇之文火于秦殘于漢馬融鄭玄王肅
之徒開闢草昧甚為簡畧古文孔傳晚出書義稍顯孔
穎達為之疏雖正二劉之失未愜學者之心求其條貫
羣言闡明與指信無逾於仲默集傳者但其意主於撥
棄注疏故名物制度之屬不能無訛筆力視紫陽易詩

二傳亦多不逮識者不能無憾焉考明初令甲本宗注
疏蔡傳附之後又以蔡傳未精命儒臣劉三吾等博采
諸說參互考訂名書傳會選頒諸學宮其後大全行而
此書遂廢又其後制科專取蔡氏而大全亦度高閣白
首窮經仍訛踵陋讀禹貢者河渠遷改眩若追風陳洪
範者九數相乘迷如辨霧此以攻經生章句猶隔重山
况望其酌古準今坐而論作而行卓然稱有用之儒哉
余竊用愍嘆此埤傳之所由作也記曰疏通知遠而不

誣書教也夫推之時務而有宜有不宜不可謂通試之
異代而或驗或不驗不可謂遠列朝經筵進講必首及
尚書誠以三五以來崇功廣業咸出其中非徒古史記
言記事之體余之輯是書也主詁義而兼及史家臚羣
疑而斷以臆說務求為通今適用之學庶幾孔堂之金
石絲竹不盡至于銷沈磨滅云爾若以仲默之書羣然
尸祝不應輒有異辭則余且擡舌而退夫仲默作傳已
不盡同紫陽之說何獨疑于生仲默之後者哉

校定水經注箋序

隋書經籍志有兩水經一本三卷郭璞注一本四十卷
酈善長注善長即道元也水經撰人則不著其姓名唐
杜佑作通典時尚見兩書言郭璞疎畧於酈注無所言
撰人槩未之考也舊唐書始云郭璞作宋崇文總目亦
不言撰者為誰但云酈注四十卷亡其五然未知兩注
之一存一亡已見於斯時否也新唐書乃謂桑欽作水
經一云郭璞作今人言桑欽者本此崇文總目作於宋

景祐與新書志同時不知新志何所據以為說也說者疑桑欽為東漢順帝以後人以經有瑯縣之文也然經云江水逕永安宮南永安宮昭烈托孤孔明處又云江水逕諸葛亮壘圖南得非三國間人所為也不寧惟是其言北縣名多曹氏置南縣名多孫氏置金源宇文氏以為經傳相淆經傳既淆則作經作注之人不可分也此皆歐陽玄之所致疑也以愚覈之西漢儒林傳載塗惲授河南桑欽君長尚書晁氏云欽成帝時人使古有

兩桑欽則可審為成帝時桑欽則藝文志不應不載其書又所舉水道地名不應多屬東漢以後也酈道元注每引桑欽之說皆與水經不同又不應一人之言彼此自相違戾也及考道元所引自云桑欽地理志而不及水經則知欽所撰者乃地理志爾後人因其書失傳遂誤以為水經此新書志之失考也郭璞之注杜佑譏其疎畧必非無此書五代干戈搶攘遂已逸之今道元注載郭景純云云殆即彼注中語而或以為郭璞作水經

此又舊書志之失考也或者又疑桑欽作之於前郭璞附益之於後他書或有後人增入此則不然也金禮部郎中蔡正父作補正水經三卷元蘇天爵梓行其書歐陽玄為之序據云正父因宇文氏之言而感發一正蜀板遷就之失于趙代間水特詳江自尋陽以北吳松以東又能使道元無遺憾惜乎此書之不見于今也雖然水經既無古本可據與注不免相淆正父以數百年後之間見而補正之竊恐欲正其淆而淆愈甚也余謂此

書不可讀者不惟經傳相淆尤恨闕文與錯簡往往而是今鄺注雖仍四十卷已非原本之舊太平御覽引水經注語多今本所無則所亡五卷誠無從得而考補矣若其彼此之互移前後之倒置苟覃思博覽之士循文繹義猶可得而釐訂之也先朝萬曆中王孫朱鬱儀與謝耳伯箋校此書主以宋本參以吳歙二本更其錯雜者得十之三四至於河水與大河故瀆張甲屯氏諸河及漯水沔水江水之類尚未能考定識者憾焉余以暇

日重加鈎索其中汨亂混淆者據古今地理一一取而
割正之於是斷者得連離者得合顛倒者得次第庶幾
讀者不至聱牙棘口輟卷而嘆雖小小訛脫時復有之
然於此書大體無傷也至於水經撰人不知為誰斯固
當從闕疑之例姑置弗辨可也

陸翼王曰宋潛溪嘗有辨此文
條析更為精細真讀書人心眼

輯注杜工部集序

客有譙於余曰子何易言注杜也書破萬卷塗行萬里

乃許讀杜子足不踰丘里目不出兔園日取詩史而排
纂之穿穴之冀以自鳴于世吾恐觚稜利而擲揄者隨
其後也余曰是固然已抑子之所言者學也子美之詩
非徒學也夫詩以傳聲節奏成焉聲以命氣底滯通焉
氣以發志思理函焉體變極焉故曰詩言志志者性情
之統會也性情正矣然後因質以緯思役才以適分隨
感以赴節雖有時悲愁憤激怨誹刺譏仍不戾溫厚和
平之旨不然則靡麗而失之淫流澶而失之宕彫鏤而

失之瓌繁音促節而失之噍殺綴辭逾工離本逾遠矣
子美之詩惟得性情之至正而出之故其發於君父友
朋家人婦子之際者莫不有敦篤倫理纏綿菀結之意
極之履荆棘漂江湖困頓顛蹶而拳拳忠愛不少哀自
古詩人變不失貞窮不隕節未有如子美者非徒學為
之其性情為之也子美没已千年而其精誠之照古今
殷金石者時與天地之噫氣山水之清音噌吰響答于
溟滓瀕洞太虛寥廓之間學者誠能澄心被慮正己之

性情以求遇子美之性情則崆峒仙仗之思茂陵玉盃之感與夫杖藜丹壑倚棹荒江之態猶可儼然晤其生面而揖之同堂不必以一二隱語僻事耳目所不接者為疑也且子亦知詩有可解有不可解乎指事陳情意含風喻此可解者也託物假象興會適然此不可解者也不可解而強解之日星動成比擬草木亦涉瑕疵譬之圖罔象而刻空虛也可解而不善解之前後質時淺深乖分欣忤之語反作誹譏忠剋之詞幾隣懟怨譬諸

玉題珉而烏轉鴛也二者之失注家多有兼之偽撰假託疑誤後人替說支離襲沿日久萬丈光燄化作百重雲霧矣今為剪其繁蕪正其謬亂疏其晦塞詒誦博間網羅秘卷斯亦古人實事求是之指學者所當津逮其中也余雖固陋何敢多讓焉客曰子言誠辨然當代鉅公有先之者矣子之書無乃以爝火附太陽余曰材有區分見有畛域以求其是則一也今夫視日者登中天之臺則千里廓然閱之于曲牖所見不過尋丈光之大

小誠有間然不可謂曲牖之光非日也賢者識其大不
賢識其小總以求過子美之性情于字鉤句索之外即
說偶異同亦博考羣言折衷愚臆豈有所抵牾齟齬于
其間哉客退遂譔次其語以書之卷端

戰國策鈔序

嗟乎吾讀短長之書然後信子輿氏之以仁義說齊梁
為深切事情而不可易也夫戰國之亡以策士策士之
亡戰國則以利也王澤既遙七雄雲擾力侷勢敵權誦

相高於足儀秦軫行代厲之徒競起而投其隙朝從暮橫陽施
陰設其所命為策士者不過市魁盜俠之輩如鬪狗然交啗
以利而已矣彼懷馭僮之心此挾傾危之術苟售詐謀雖裂身
湛族而不顧其毒至於干戈相尋坑殺動以數十萬計秦政之
時民之僅存者無幾矣夫鋒莫銛於利而劍戟為下禍莫慘
於利而參夷為輕方其抵掌華屋之下語穿心兵不過欲以遂其
躍馬疾驅黃金橫帶之樂而豈意其流毒之遠一至此哉吾故
曰七國之亡以策士策士之亡戰國以利也然則其書何以不

廢曰是烏可廢也春秋以後楚漢以初二百四十餘年之行事
備焉是史之流也史家兼載善惡以明是非且夫不啻茶蓼
不知梁肉之足以飫口也不歷冰霰不知陽和之足以悅膚也
不深覽言利之害亦豈信稱先王陳仁義之效可以行千萬世
而無弊也哉況乎其文之雄深峭健龍門史傳多取裁焉一
時人物如仲連之高蹈樂毅之篤忠鄒忌王斗觸讐之進說
皆有當於儒者之正誼烏可以其出於戰國而不道哉是書
雖經南豐校勘舛誤猶多鮑彪復紊亂其章次剗川姚宏

會粹諸家而是正之最稱善本惜近世不可復睹先朝張叔大
陸子淵兩先生嘗為之評解芟繁纂要劃然中槩其於
史漢行文之法備有發明吾友茂倫珍秘多年今為鋟版
而行之亦兩先生之功臣也已

新編李義山文集序

義山老於幕僚故其集章奏啟牒居多通考載樊南甲集二
十卷乙集二十卷又雜文八卷今都散佚不存所傳者僅詩集
三卷耳余箋註其詩檢閱文苑英華唐文粹御覽玉海諸

部蒐緝義山文凡得表書啟箋檄序說論賦祭文墓碑等作共若干首釐為五卷又以新舊唐書考証時事畧為詮釋而因題其首曰四六之名不知何昉義山云四六者六博格五四數六甲之取也未足矜然則此本非文章家所重而六朝以來持尚之斯古文所由日下耶厥體繁於齊梁至庾子山而纖麗極矣唐初四傑以及燕許諸公踵事增華號稱絕盛其體裁閎博音響琳琅較過前人而清新雋拔則微有間焉子美詩云庾信文章老更成凌雲筆意勢縱橫又云王楊

盧駱當時體輕薄為文哂未休雖不置軒輊其間然文章流別亦畧可睹矣義山四六其源出于子山故章摘造次之華句挾驚人之豔以磔裂為工以纖妍為態迄于宋初楊劉刀筆猶沿習其製誠厥體中之旃檀薈蔔也已若夫雪皇太子書諭劉稹檄則侃論正辭有風情張曰霜氣橫秋之槩及讀辭張懿仙一啟又見其悟通禪悅所得於知玄本師之教深矣此豈區區妃青儷白鏤月裁雲者所能及而唐史稱其文第以繁縟恢譎目之豈得為知言哉余

嘗觀晚唐人文章如李甘沈亞之陸龜蒙司空圖數子最為卓犖瑰瑋而世罕睹其集欲從文苑諸書中摘鈔出之以備一家之作特病懶未暇姑以此集為乘韋之先云

陽明要書序

宋儒理學莫粹于濂溪明道一再傳而為考亭象山象山直探原本注脚六經考亭博極散殊窮研著述吳幼清以為一主尊德性一主道學問二家各尊所聞行所知持論多齟齬不合至無極太極之辨象山掎擊再三考亭亦無

以難也後世儒者多右朱而左陸遂疑象山為禪不知聖
賢之學皆心學也文章之盛所以明此心節義之嚴所以
持此心事功之大且久所以驗此心心惟無一有故能無
不有無一有者心之無待而神無不有者心之隨感而現
孟子曰仁人心也學問之道無他求其放心而已矣此千
古學論準的而何疑于象山哉夫禪之與吾儒異者其始
離動求靜其既欲以靜攝動惟岐體用而二之也岐體於
用故專守其空寂岐用于體故旁出為神通若象山之學

則皆本明道靜亦定動亦定無內外無將迎之說雖功施未究于天下而立言垂教務使學者返求之心其言曰心之神明是為聖此固孟氏之嫡傳宗子也後三百餘年而陽明先生出焉以致良知為宗大闡心學困踣蠻徼而此心愈明驅馳軍旅而此心愈定驟膺艱大更歷謗疑而此心愈不動自有用道學無踰先生者蓋其學即象山之所以學其教即象山之所以教而已矣世之以禪疑先生者特因其掃除聞見往往彈射考亭吾謂此非真彈射也俗學

崇奉考亭太過遂至溺惑於語言文句之間舉其曰主
敬曰窮理曰豁然貫通之精義盡汨沒無餘先生出而
灑然正救之其彈射所加正羽翼之深意而世顧以疑
象山者疑先生然則孟氏所云求放心不學慮者其亦
將為竺乾之導師梵夾之賸語矣乎先生高弟子為錢
緒山王龍溪龍溪放談玄渺其流弊至為顏山農何心
隱之徒緒山恪守師說今全書其所手定也顧名目紛
糾義例雜出其駁而未純者不免間有幾亭陳先生自

未第時已覃精理學取先生之書剪截而刊定之宣其
義蘊一其指歸大廷尉葉公刻之廣中於是先生之宗
旨始粲然大明於天下嗚呼心學之不講久矣學者誠
取此書而沈研省發去其詞章之俗尚與功利之蒙情
以求所謂此心此理者何在則文章也節義也事功也
特太虛中之糠粃塵垢耳百世而下有欲因陽明以知
象山因象山以知濂洛因濂洛以知孔孟者其能不奉
是書為汎海之斗杓入河之碣石也哉是為序

甫草曰自唐以前止有儒林列傳宋史始分儒林道學近人鄧元錫又分薛文清輩為道學陽明為心學不知心學之外無道學也此文方見得儒家正傳

讀左日鈔序

春秋三傳竝立公穀乃經師之學左氏獨詳於史事蓋古者史世其官左氏必世為魯史如晉之董狐齊之南史楚之倚相能尊信聖經而為之作傳廣求列國諸史乘管仲晏嬰子產叔向諸名卿佐之行事無不詳以及卜筮夢占小說雜家之言無不采大事策書小事簡牘

閱稽逖覽綜貫秩然故其文章最為典則華瞻而後之
儒者或病其誣或病其浮夸或病其立論多違理傷教
則何也夫子感獲麟而作春秋去夢楹不三載其指趣
未及顯以示人左氏之遊聖門也晚又未必與游夏之
徒上下其議論則其躋駁而不醇者固宜有之且左氏
所稱書不書先書故書之類皆本之舊典為史家成法
聖經則不可以史法拘或事同而義異或事異而義同
夫子蓋有特筆存焉自不修春秋既亡不知何者為筆

何者為削各信胸臆穿鑿繁興至於紹興之講進面說之殺雜極矣雖然筆削所據惟事與文左氏即間有舛訛而臚陳二百四十二年史事則十得八九杜元凱推校經傳亦極精詳學者誠淹通此書研究事情因以推求書法一切刻深碎瑣之見勿橫據於胸中而以義理折衷之安在筆削之精意不可尋繹而得乎今左氏之書家傳戶習特其筆法簡古文之艱澀者義之隱伏者往往費人推索元凱注既多未備而孔仲達疏復卷帙

繁重學士家罕閱其書東山趙子常特申不書之旨輯
為補注多與經義相證發余珍秘有年復廣演而博通
之疏淪幽滯辨正譌舛自孔疏而下弋獲於劉原父呂
東萊陳止齋王伯厚陸貞山邵國賢傅士凱者居多又
取春秋人物引繩墨而論斷之使學者知古今人材之
盛莫過於春秋兵法之精亦莫過於春秋應變出奇益
人神智讀史者常有取焉至於左氏全文明曉易見者
則概不之及自愧謏陋此不過備遺忘資討論而已若

欲從事聖經成一家之學必如黃楚望所云先以經證
經次引他經證又次以經證傳又次以傳證經展轉相
證更復出入羣書此非余力所能任也姑存其說以俟
世之述作君子

左氏春秋集說序

記曰屬辭比事而不亂深於春秋者也今之說春秋何
其亂與則凡例之說為之也自左氏立例公穀二氏又
有例啖趙以下亦皆有例言人人殊學者將安所適從

如稱爵者褒也而會孟何以書楚子則非盡褒也稱人者貶也或將卑師少也而僖公之前何以君大夫將皆稱人則非盡貶與將卑師少也稱字者貴之也而邾儀父許叔蕭叔有何可貴乎殺大夫稱名者罪之也而陳洩冶蔡公子燮有何可罪乎諸侯失國名而夔子萊子不名滅同姓名而楚滅夔齊滅萊不名則其說窮矣不書公子為削其屬也而弑君如楚商臣齊商人反稱公子則其說又窮矣卿卒必記日月公至必告於廟益師

不日薄之也而成公以後皆書曰桓會不致安之也而
公行大半不書至則其說又窮矣不得已有變例之說
夫所貴乎例者正取其一成而不可易若前後游移彼
此乖忤何以示萬世之繩準嗚呼夫子作春秋上明天
道下正人事變化從心安得有例例特史家之說耳自
隱桓至定哀二百四十二年間載筆者既非一人則或
詳或畧不免異辭所見所聞難於一概就史法言之尚
無一成之例而乃欲執後人之例以按經又欲屈聖人

之經以從例其可乎哉然則如之何亦曰求之春秋之
所以作而已矣夫子曰吾志在春秋又曰其義則丘竊
取之何謂志尊天子內中國討亂臣賊子尊王賤霸是
也何謂義善者吾進之予之惡者吾退之奪之彼善此
者吾猶進之予之純乎惡者吾亟退之奪之是也志以
義明義以時立春秋之始諸侯驟強則絀諸侯以扶天
子春秋之中大夫專政則絀大夫以扶諸侯春秋之季
陪臣亂國則又絀陪臣以扶大夫而前之治楚後之治

吳越往往示其意於樊桓文愛宗國爵齊晉宋衛諸君之中若此者凡以尊天子也明王道也一筆一削蓋皆隨世變而為之權世變異則書法亦異而豈有變例正例之可求哉後之說者乃曰聖人有貶無褒或又曰聖人初無褒貶夫有貶無褒則春秋為司空城旦之書聖人宅心不應如是刻覈若無褒無貶則全錄舊史是非不明何以有知我罪我之言而能使亂臣賊子懼耶吾故專以聖人之志與義為斷不能得乎聖人之志與義

則隨事生說辨愈繁而不可立教能得乎聖人之志與
義則凡例諸說何嘗不可與聖經之微文奧旨相為發
明而近世儒者著論乃欲盡舉諸例而廢之其亦固而
不可通也已余為此書主以左氏傳取杜注孔疏及公
穀啖趙數十家之論聚而觀之參互權衡藁凡數易痰
疾寒暑腕不停書雖未知於聖人之志與義若何而古
今諸儒支離膠固之說刊剝無餘少以資學者經術經
世之助庶幾於屬辭比事而不亂之旨或有當云

附錄左氏春秋集說凡例

左氏傳經在公羊穀梁之先故經文專據左而以公
穀參焉傳文不能全載今節畧其事蹟於經文之下
然後引用注疏諸家之說此倣黃氏日鈔體也
三傳之後啖叔助趙伯循陸伯冲三家可謂通經所
輯辨疑纂例條理秩然今多引其說參以趙子常王
方麓之論而衷衡之學者先觀此則全經燎如矣
胡傳專重復讎討賊誠有功世教然立論頗迂濶而
穿鑿張元德春秋集注較胡氏特平正洪武初詔頒
學宮今人罕見其書矣余志在表微故采之獨多
劉原父權衡以辨誤為功陳君舉後傳以不書立義
吳臨川纂言汪新安纂疏李廬陵會通皆能闡繹微
指又劉質夫許襄陵孫明復高息齋王彥光呂永嘉
家則堂諸解大全去取未必悉當今擇其粹者錄之
葉石林趙木訥戴岷隱黃東發諸家之說多先儒未
發而大全不載則纂修諸公之罣漏也余徧搜藏書

家得之亟
為采入

毛詩稽古編序

昔夫子刪定六經而其自言曰信而好古夫三皇五帝之事若存若亡蓋有不可深求者矣如河圖洛書出苞吐符天人相接此與後世之天書何異而夫子顧信之不疑下至商羊罔象汪芒僬之類尤為喬宇鬼瑣夫子亦時時述而志之蓋其學綜墳典徵文獻稟師傳苟古人之所有無不考求詳慎而不敢以私見汨亂其間

此所以為善述也詩序出於子夏之徒大小毛公亦秦漢間人詁訓視他經最古鄭康成取其義而為箋即不免踳駁自有聖門闕疑之法在今人概點為郢書燕說此不可解也爾雅一書古人專以釋詩亦子夏之徒為之至六書必祖說文名物必稽陸疏皆先儒說詩律令今人動以新義掩古義今音證古音此又不可解也說者謂考亭集傳頌諸功令學者不敢異同然考亭嘗為白鹿洞賦中云廣青衿之疑問樂菁莪之長育仍不用

已說門人問之曰序說自不可廢然則考亭之意亦豈
欲學者之株守一家而盡屏除漢唐以來諸儒之箋傳
如今人之安於固陋荒忽者哉余向為通義多與陳子
長發商榷而成深服其援據精博近乃自成稽古編若
干卷悉本小序注疏為之交推旁通余書猶參停今古
之間長發則專宗古義宣幽決滯劈肌中理即考亭見
之亦當爽然心開欣然頤解嗚呼經學之荒也荒於執
一先生之言而不求其是苟求其是必自信古始夫詩

之有序也猶江之發源羊膊嶺也毛鄭則出玉壘過湔
壩而下時也後儒之說則歷三峽分九道汨汨然莫知
所極今與之導源岷山使知緣崖數百激湍萬里之皆
濫觴於此也豈非記所云先王祭川必先河而後海之
義乎世有溯源三百者必能尊奉此書為孔傳未墜長
發其俟之而已

西崑發微序

義山之詩原本離騷余向為箋注而序之曰男女之情

通於君臣朋友夫屈原之時其君則懷王也其所與同朝者子椒子蘭也原之耿介能無怨乎怨而不忍直致其怨則其辭不得不詭譎曼衍而義山一祖其杼軸以為詩以故瑰采驚人學者難於逆志余之箋注特鱗次羣書析疑徵事而已若其指趨之隱伏者固不能條件指晰將以待世之曉人深求而自得之焉今春次耕歸自玉峰以吳子修齡西崑發微示余其說以為義山無題詩皆為令狐綯作也義山受知令狐楚後就王鄭之

辟絢與黨人排斥之終其身義山固功名之士也能無
怨乎怨則以神仙之境為豔情中悅之間作度語斯固
夫君美人靈修山鬼屈宋之家法也豈徒麗藻云爾乎
往虞山馮子定遠嘗語余義山無題詩皆寄思君臣遇
合其說蓋出於楊孟載今得修齡解益可與定遠相證
明足埤益余箋注所未逮修齡真曉人哉修齡精律呂
之學妙有神悟蓋今之異材茲特吉光片羽爾敬題首
簡歸之以志余傾倒之意

周易廣義略序

余嘗讀左氏傳曰物生而後有象象而後有滋滋而後有數知象居理數之先又讀繫辭廣八卦知六十四卦中凡近取諸身遠取諸物者無不於此乎探賾索隱乃益歎今人讀易盡廢象不講何異擿埴索冥自以為昭昭揭日月而行也然余之為廣義則仍主輔嗣仲達之注疏與伊川之傳以推衍考亭所未備然後博引李鼎祚集解諸書蓋意在即象以顯理而非欲離理而專求

之象也

宋史載漢上朱子發著易解以程傳為宗包括古今參和理象為當時所稱余廣義一書實竊

取其


如離理求象必將流入於穿鑿附會而不可為典

義
要漢魏以下如鄭玄荀爽王肅干寶陸績虞翻崔憬侯
果諸家都從卦變互卦取義非不時契易旨而穿鑿傳
會迂僻不可解者亦往往有之所以自宋迄今世不復
尊信其書也近讀來梁山唐凝庵錢啟新三公論著實
獲我心而亦時見其穿穴旁解撥遺程朱正義則又疑
其矯枉之失何玄子總統羣言善矣而別裁之功尚有

未至此學者所當徧觀博識精求而約取之者也伊川傳易每略於卦變故自言止說得七分考亭本義中絕不及互體然大壯六五云卦體似兌有羊象焉此非互乎蓋二子之書專明義理則象學自有所未遑實非舉漢魏吳晉諸人所得欲盡掃而芟蕪之也誠能兼通象學而又不膠執乎其說豈非程朱二子之所樂予者哉余友吳子弘人研窮易象夙有同心與余同輯此書始自己未不意弘人奄忽捐館余復抱滯下之疾遂為輟

管陳編堆積架上陳子長發一日過余曰古人一隅反
三經何必全解如黃東發王伯厚以略解而傳者多矣
子何不撮舉其要自為一書以示來者余感其言乃剴
取其中撮合理象參論古今諸儒得失者得一百餘條
復增益十餘條詮次為四卷名曰廣義略云昔王晦叔
名炎著易解未竟而病篤晦叔每夜分祝天曰願假一二
年毋死以成此書果遂其志今余一病而憊憊而遂不
於廢業微獨學力不逮古人精誠亦遜之遠矣然則全

之拳拳最殘而不忍盡付之於凋零磨滅者烏敢自謂
于易學有裨乎亦欲使後之人知余之於易蓋有力不
從心之憾如此也壬戌中秋日書



愚菴小集卷七

欽定四庫全書

集部

愚菴小集卷八

詳校官庶吉士臣汪彥博

助教臣常循覆勘

總校官庶吉士臣何思鈞

校對官中書臣田尹衡

謄錄監生臣張鈞

欽定四庫全書

愚菴小集卷八

吳江朱鶴齡撰

序二

史弱翁詩集序

嗟乎士之能以文章著述成名於後世者豈非天為之哉余少嬰沈瘵勉習舉子業弗好也顧獨喜談說騷選及西京大家之文見有服奇嗜古不牽世俗趨舍者必

折節而與之遊弱翁其一也弱翁尊君某甫登賢書而
歿弱翁艱窶萬狀遂發憤為詩文絕意干祿之學俗子
疾其所為以為古文之道如盲者之於鑑禿者之於櫛
甌越人之於章甫安所貿衣食者而沾沾為交口媢笑
之且排窄之弱翁卒岸然不顧京口潘木公稱道之於
諸公間名稍稍起於是沂長河遊燕邸眺覽帝京宮闕
之雄燕然碣石涿易滹沱山川起伏鬱紆磅礴之氣勢
以及荆卿漸離悲歌擊筑子美南池太白酒樓諸故蹟

盤桓徙倚慷慨感激一發之於詩章歸而抵永嘉寓金陵所與唱和者如顧與治邢孟貞楊龍友方爾止輩皆名士是時寇起三秦殘躡中土弱翁感時諷譏刺刺不休每過余蕭齋出所作相示談及門戶箱結盜賊披猖之故未嘗不太息歎歎繼之以泣也弱翁之詩崢泓蕭瑟初值鍾譚主盟相率為淒聲促節未能自振於古後居東湖與惕齋聯和則全法少陵格律日進及遭崩圻之變方期偕余輩數人晞髮湖濱修谷音海錄之故事

而未幾死矣惜哉弱翁歿十餘載蒸嘗不續遺書散落人間其所著鹽法志燕京遺事松陵耆舊傳無能搜討所在僅得詩若干首為評選而欲梓之以多故不暇每一興念輒用憮然嗟乎服奇嗜古之士世不多見也幸有其人矣而復丁屯蹇既窮餓其身促其年以死死而復奪其脩又將彫零磨滅其所著之書使之無可表見於後世何天於服奇嗜古之士虐之如此其酷也天虐之酷而於人之姍笑而排窄之也又何憾焉

宋旣庭曰純是故舊凋落之感
悲涼紆折學歐陽而得其神韻

送董處士歸湖濱序

勢榮者人慕之道榮者人疑之厭膏腴欺紃穀高車大
蓋夸耀州閭宗黨間此勢榮也身都儒雅與時進退抗
顏千古之林雄覽萬物之表此道榮也充於勢而詘於
道古人猶有塵垢軒裳逃之寂寞之濱以為快者況乎
乘危抵巇苟竊旦夕之光曜於蜩螳沸羹之中此如操
漏舟以試洪濤策敗轅而上峻坂方沈溺顛覆之不暇

又何榮辱之足云哉董次公張西廬處子之秀者也先朝以高才生困頓場屋近乃沈研經術著書自娛西廬足不入州府次公以井稅至邑治必訪余寤言跼然足音致足樂也今年秋余抱先子之戚讀禮江灣草菴次公拏舟來唁流連晨夕商榷古今每至析疑領要則油然而喜又悄然以悲喜者喜吾道之不孤悲者悲歲月易徂而修名之不立也將歸湖濱次公起曰子何以益我余告之曰子瞻有言人不可以苟富貴亦不可以徒

貧賤貧賤之樂舍通經味道曷尚焉阮嗣宗陶元亮居
晉宋之間皆偃蹇不與世接吾獨惜其未能聞道而徒
以曠懷高致稱也夫使二子者有志聖賢之學則述作
當日益進又何暇逃名於麴蘖放意於沈冥耶今我與
子以遯處之身詁訓風雅探索皇墳亦既優柔而浸漬
之矣由此而升其堂而躋其闕譬若登山然不陟陁躋
學弗可以止也修之墨墨寶之仡仡視彼汨喪於詞章
之末聲利之場者不過如甕中蠛蠓經宿卽化耳而豈

以易吾樂哉次公曰旨哉斯言敢不夙夜加殖以實子道榮之說遂抗手而別并識此語諗西廬用相警發焉

送徐介白移居上沙序

隱居之必於山林也猶之應龍必蟠積水之淵威鳳必翔寥廓之表也又猶之崇蘭紫芝非託根于深巖大谷則無以蘊幽貞而表秀異也自昔人有大隱朝市小隱山林之說而脂韋汨沒與俗浮湛者反借之以藉口嗚呼通才達節之不可幾于世也久矣蚪龍蹇曲滄津與

蠓蛭何異乎鸞皇降處丘樊不為虞羅所中乎芝蘭生於盆盎世且與蔓草媽花同翫又安知荃蕙之不化而為茅幽蘭之不變而為葦施蕭艾也乎此吾深歎介白之考槃山居浩然長往為不可及也介白少以風雅標持嶽寄歷落格韻在東野閻仙之間時復點染毫素縹緲煙雲咫尺萬里而又皈命瞿曇夙通宗旨熏修斷慾衲子難能夫詩也畫也禪也三者皆丘壑中物即使介白志遂風雲身名兩泰猶當託尚山林有衣冠巢許之

目况世棄君平矣君平安得不棄世哉上沙接武靈巖
湖山環抱縑素名流往往萃止以介白織簾抱甕其間
香草夾徑嵐翠撲衣麥雉朝飛村舂互答皆吾詩情也
松濤瀑雨遠近爭飛雲木虹泉晨昏變色皆吾畫態也
遠寺霜鐘發人深省空林野火可悟無生弔響牒之幽
魂悲琴臺之故址興亡一揆死生同夢皆吾禪心道味
也然則介白之隱洵無忝戴顓宗測介白之上沙安知
不與龐公之鹿門鄭敬之蟻陂杜景齊之始寧山舍竝

傳千秋史策也哉余久厭塵勞每思於松林深處誅茅
小築讀書嘯咏其中而家累殫人刺促與雞鶩同食此
吾於介白之長往既深歎之又深媿之而不敢但以離
羣為悲也他日向平願畢便當僦舍東隣衡宇相接與
介白隱素木几酌斑蠹盃誦正則女蘿之章歌小山叢
桂之句庶幾東臯子之仲長子光也介白其許我乎

尤展成曰葱蒨馥郁近初唐文字今人
學歐蘇者漸流制舉一路吾寧取此種

贈洪廣文計偕序

六書者經籍之權輿也聖人以之該三才之理備萬彙
之情俗學罔探源委好出私見穿鑿由是經解晦塞沿
訛失真士而欲考古正今必自六書始矣夫鳥跡之降
而大篆也大篆之降而小篆也小篆之降而楷隸八分
也勢也然周官設太史氏以掌書契秦吏人多誦爰歷
之篇漢制能通急就者為郎則猶知重之也後世考正
無專司教異學殊曲說四出蓋自唐孝明詔衛包改古
隸為今隸小楷行而聖籍古文不可復睹點畫轉易意

義乖離尚書之文於六經為最古而訛誤不一如擾而

毅之與俶擾天紀一當从擾

如招切

一當从擾

與擾同

此訛

在混淆者也兗州厥賦下下下轉為正正又轉為貞

此訛在變易者也舉二端而全書可知也舉一經而他

經可知也干祿之家既薄文字為瓌節耆師宿儒以專

家稱者亦不過稍稍曉音讀涉訓詁而已嗟嗟生今之

世為今之學而欲是正典文汰俗說而復古義其將何

塗之從耶歛州洪氏代有聞人陝翁先生尤精六書之

理自爾雅說文以迨陸德明吳棫黃公紹鄭樵周伯琦諸家之說靡不博覽而沈研之其司教吾邑也諸生以制舉義來質者必進之以經學以經學來質者必進之以篆隸古文凡音韻清濁形體豐殺義解淺深流俗相沿未正者一經講明皆粲然有緒世謂廣文片席特優游就閒之地為療饑謀耳其能與子衿之徒商榷制藝者已少況進而經學乎又況進而篆隸古文之學乎如先生者誠可尚也已雖然愚願竊有請也許氏一書為

字林金科玉律乃其重複闕佚僻戾而未可信者尚多有之古籀二文宋景濂疑呂忱參入其間非復許氏之舊今誠祖古籀而宗說文參之以徐氏繫傳又博采諸家之說訂訛補佚勒成一編他日校書石渠如蔡中郎正定六經鐫石太學門外故事俾後儒晚學咸取準焉其有功古籍甚大以較口陳手畫教行於松江笠澤之間者相去豈不徑庭也哉余不敏於六書精蘊未窺一斑先生屢枉荒廬因得諮質疑義曠如發蒙今將與計

偕入京師不可以無言輒泚筆書此以為繞朝之贈

贈徐處士序

好名非古也逃名尤非古也三代之時賢能俊造皆鄉大夫所書而升之進則流茂實於本朝而非以為烈也退則卷姦修於窮巷而非以明高也名士之目其始於魏晉之間乎蓋自漢季不綱孝弟力田之科既廢士之登用者多出於九品中正之一塗於是矜聲華而競標榜遂有封股廬墓以為孝敬車贏馬以為廉茹芝飲澗

以為潔者而名與實始判為二矣然當時品目猶斤斤乎慎之諸葛孔明綸巾羽扇指揮三軍司馬宣王嘆曰諸葛君可謂名士矣夫孔明之兼伊呂失蕭曹千古無兩而始以名士許之則名士之矜重何如也袁侍中謂韓康伯門庭蕭寂居然有名士風流王孝伯言但使常得無事痛飲熟讀離騷便足稱名士夫名下必干要津必走熱客而反曰無事曰蕭寂則名士之所標置又何如也世固有姓氏滿於人間而不得謂之名士亦有從

子三十年不知而不得不謂之名士然則名士之所以
居名者其必有道焉而必非好之而即來逃之而可去
也蓋章章已吾友徐子侯齋迹空山逾二十載戶屨
無間炊烟不接條然環堵與袁閔之土室焦先之蝸廬
無異此其人好名者耶抑逃名者耶以為好名則今之
高軒大蓋輝赫當塗者絕不間有所謂徐子者也以爲
逃名則徐子之窮年汲汲著書等身自六經諸史之言
下迨稗官雜說無不淹通而鍛冶此其意豈欲以山澤

之臞與浮埃委翳同其銷滅者哉嗚呼今之所謂名士者吾知之矣非藉門廕則不名非廣交遊則不名非豐脯醢則不名非樹柴柵則不名非操衡纊則不名非驚通都大邑則不名王眉子輕其叔何有名士但終日妄語而今非游談詼誕則不名宜識者以名士為羶途為偽府岸然掉臂而不顧然則徐子之所逃逃羶耳逃偽耳而豈以逃名也耶且夫名亦烏可逃也人有避影而之乎日中者避愈疾影愈多使名而可逃則沒世無間

不當為君子之所疾屈平放逐行赴汨羅矣而猶曰惡
修名之不立此何以稱焉今以徐子之行誼確苦皎然
不欺其志所著文章又無不可傳千秋而俟百世者吾
知道北之周顥終南之种放徐子且曠然不屑况於挾
牛腰卷軸請謁奔走藉口陶公乞食者烏足當劍首之
一吷哉然則他時太史欲采真隱傳高士即不於徐子
屬而誰屬也雖謂今之好名人莫徐子若焉其亦可也

孝章曰古以高士名士為一今以高士名士為二然
天下有名而不高者矣未有高而不名者也吾讀此

文有
深感

爛溪會詠序

夫道存丘壑非縞紵無以攄懷侶集簪裾必詠歌方能
見志是以南皮雅製高擅鄴中曲水新篇爭傳上已至
若漢陰衡宇歡情接於漁梁陶令琴尊勝社聯于廬阜
杜陵蒿徑求羊聚塵外之蹤甫里茶園皮陸結散人之
契是皆情有所寄則侔軒舉于伏鶻離鸞地無可容爰
傲陸沈于高山流水清風尚矣嘉話邈焉吾友侍御周

子投替末造抱甕清溪家有賜書丹鉛不輟徑無俗駕
嘯咏為勞選勝事于花朝送牢愁于文讌履綦接跡香
浮庾信之園枕簟投林花滿謝公之墅于時碧流繞砌
幽鳥變聲烟雲幕于堦除竹栢清其顧盼青蘋點點遙
生入座之風朱草垂垂似助含毫之色叶宮商于腕下
貫珠貝于行間招楚客之魂則庭悽別鶴寫湘君之怨
則樹咽奔濤桐葉分題列組之章備矣石欄斜點粲花
之筆斐然俄而日隱西軒烟橫遠浦嘉羞屢進清笋分

曹對蘿月以狂吟撫簷花而長嘯支頤散髮同期北郭
之隱淪解帶披襟共雪新亭之涕淚戶外之盲風墨霧
都遣沈寔堦前之白石清泉盡收眺咏嗟乎曲高寡和
翻見笑于巴人身隱焉文非所安於吾黨篇章互答陶
寫不孤與此盟言何俟揮嵇絃而蠟阮屐登斯風雅洵
可居竈北而老牆東以視疎雨微雲嗟稱止孟公之句
椒園竹館屬和惟裴迪之章既興會之異方亦鏗鏘之
具美者已不佞黽勉盤匝追趨杖屨悅同心之追琢悲

大化之推遷金谷寒渠空對銅駝之陌蘭亭峻址尚傳
蠶繭之書不假濡翰曷留陳跡遂無辭乎首簡冀有述
於將來爾

思舊詩序

夫情深疇昔則金石為移感切音容斯河山增邈是以
橋公墓道遲回孟德之車中散舊廬惻愴鄰人之篋又
况時丁板蕩代隔風流如芝貫薜高其標碎首納肝厲
其節者哉吾友徐子楨起系出偉長才同孝穆英年作

賦陪華轂于李君茂采蜚聲對清樽於北海乘車戴笠
共堅白水之期交呂攀嵇皆屬青雲之器俄而虞淵漸
薄斲梗俱漂或銜精衛之寃或寫靈均之怨或鑿坏而
力傭井臼或寄繭而肥遯山阿陽歲未周哲人幾殄日
斜庚子沈沈賈傅之魂徑斷西州慘慘羊曇之慟白楊
成抱難求挂劍之延陵碧海移情莫遇賞音之鍾子鸞
莊爛漫泣盡湘纍覽社荒涼夢迴泉壤此徐子所為追
舊遊而發喟援柔翰以申懷者也夫燕公五咏寄愁岳

浦之雲子美八哀雪涕巴東之峽是知感隨境而悽咽
情緣人以纏緜豈惟風今實亦勸後音徽未沫何必訪
遺貌于虎賁風義難渝即可播德聲于金版傳諸樂府
式流彤管之芳播在輿人永備輶軒之採庶幾安仁之
誄釋怨窮泉有道之碑爭光浩劫爰題首簡急命殺青

壽黃母六十序

古之為孝也易今之為孝也難三代之時德藝升之間
門士苟一行可稱莫不有升斗之祿以養其父母故曰

其為孝也易近代耑重科目小儒剝綴斐然即可立登
魏撫其時命不猶者雖行同曾閔無由以自進寸草春
暉有感歎至白首者矣故曰其為孝也難若黃子叙九
有足異者叙九固世所稱讀書好古人也入其室翛然
澄澹巾瓶卷筴之外別無長物若將以伸長樂志終其
身者人皆曰叙九賢雖然叙九所為政難耳叙九母某
孺人以名家女早厲冰檠操今年且六十煢煢衰白矣
凡酒漿縫紉朝夕井臼之所須無一不倚辦于叙九叙

九失怙苦學既不能藝黍稷牽車牛修歲時洗腆之敬
所恃以衣且食者惟村塾數童子而硯田所收恒值儉
歲瓶之罄矣維壘之恥使孺人有幾微不平之意見于
詞色為之子者則奈何乃吾聞孺人於此固愉愉如也
適適如也數勉其子以為學人無為間人為端士無為
夸士謹治機織潔修葺齊使叙九得彈力課誦而不貽
之以高堂甘毳之憂然則叙九之賢實其母有以成之
也吾嘗謂表閔土室管寧藜牀志士自處之道也非所

以事親王介甫則云祿與位庸夫所待以為榮賢者道
彌於中而裸之以藝雖無祿位以壽其親其親亦喜無
量嗚呼介甫之說特有見於祿位之不可必姑言此以
慰子心耳而豈可望之常情哉今觀於孺人則介甫之
說果信使天下之讀書好古者皆無慕於不可必之榮
而并不致憾于三代以下單門寒冑祿養其親之為難
吾以謂孺人之賢尤足風也故因叙九來請壽言輒書
此以贈之

歸元恭曰既以教為子者又以勸為母者如此作壽文求之者必寡

王吏部西樵詩集序

顧子茂倫選山左四家詩西樵先生自京邸郵寄編年諸刻茂倫分體詮次彙為一集刻成以先生命屬不佞齡綴詞首簡乃拜手而系之以言曰昔杜樊川論文以意為主氣為輔辭采為兵衛而其序李長吉詩則以為騷之苗裔理雖不及詞則過之又曰使少加以理奴僕命騷可也夫樊川所云理豈非謂命意期于淳深而無

取踏駁乎鼓氣期於繇聯而無取梗澀乎摘詞擷采期於雅馴期于麗則而無取詭僻填綴乎指事陳情不有天然之杼軸乎籠形挫物不有日新之鑪鞴乎長吉之詩天才瑰異而陶冶之功未至程之以理則蕪音累氣往往而見樊川所以深致惜乎斯人也嘗觀杜陵之論詩矣一則曰意慳關飛動篇終接混茫一則曰妙取筌蹄棄高宜百萬層一則曰毫髮無遺憾波瀾獨老成杜陵之言慳言高言老成即樊川之所謂理也是主之以

奴僕命騷者也論至於此自非別裁偽體轉益多師掣
鯨魚於碧海者其孰能備美無憾雖長吉猶難言之况
如盧仝馬異輩之子子自異者哉西樵先生生于于鱗
之鄉而又承季木公之家學其為詩也抗墜抑揚含情
悱惻蓋深有得于騷人之旨若其澹而多風怨而不激
豔而能雅咀百氏之英華而汰其疵類樊川之所致惜
於長吉者至先生而無少歉焉則可謂之彬彬矣今海
內詩家絕盛麗色繁聲怡賞不給而按其中則朽然無

有壁諸隋宮剪綵不終夕而銷滅惟其理之不足也懸
先生詩於都市以為刮膜之金篦庶幾開元大曆之風
可復振已乎乃不佞齡竊有感者昔于鱗稱社燕都茂
秦實以布衣執牛耳今先生與懿弟阮亭先生竝官輦
轂揚扈風雅一時荔裳周量愚山繹堂諸公篇章唱酬
當復有五子七子之目自愧草澤支離無能策蹇走都
下操三寸不律與諸公角藝文壇如茂秦故事所以讀
先生之詩為之口沫手胝不能自已於歎慕者也

俞無殊詩集序

唐孟郊賈島之徒皆以詩而窮其詩又皆以窮而工今之窮於詩者率不能工何也亂離之阨其身羈孤疲茶之挫其氣往往神智耗沮而不能發間有所發矣而或學短才弱枯毫燥吻又無以寫其中感慨悲愁之致而極人情之所難言若是者豈非能詩而不能窮之故耶是故其人非矯志厲學家筆巢書者不能窮非簡棲遙集淡泊自守者不能窮視其能窮與否而其詩可知也

已吾友俞子無殊少承羨長先生家學以詩鳴於時與
弱翁介白君服諸子鏃礪文筆世變以後邳遯空山荆
扉土銜糠粃不充意顧蕭然安之據槁梧煨榾柮時出
其清文麗句與山光雲影相映發于薌林藥谷之間其
氣靜故其音和平而肆好其神閒故其體窈窕而善變
蓋吳中之詩自啟禎以來正聲不絕求其嫺雅融潤兼
含衆妙未有如無殊者也無殊之詩非所謂能窮而益
工者耶嗟乎詩之為道治性靈陶物變必叩寂求音遺

落世事汲古刻厲而後得之是故致窮之物莫如詩既已從事于必窮之途而又拒之而不受心跡乖反噉沓紛紜其下者以是為獻諛之媒干澤之具聲利薰心繁華鑠骨如其詩必不工雖工亦不傳吾益嘆無殊之能窮為深有得于詩道也且夫三致千金苦身力作與魯望之筆沐茶竈孰勞而孰逸駟馬高蓋上下坂折與無功之東臯北渚孰安而孰危然則無殊之晏坐空山長歌短詠所享受于烟嵐霞石水簾樹錦之樂者亦既

富且奢矣而猶以世俗之窮窮之不幾鷓鴣翔而下視
數澤也乎

送計甫草北遊序

夫桑弧懸戶男子有志四方蓬葆戒塗壯夫寧甘三徑
出門閭而揮手便隔關山辭親串以晨興誰同樽酒誦
北征之賦魂實黯然咏西候之章悲難叙矣吾友計子
甫草建標藝苑嚙矢清流蘭成射策之年早推玉價高
密封侯之歲尚阻龍津雖復隱約清風宅帶陶潛之柳

蕭條素業厨烹鮑照之葵然而流詠樹護每嘆尸饗之
不繼關心華黍欲資采椽以何堪爰擔遊趙之登遂理
入秦之僑指飛蓬而適遠目慘河梁凌密霰以長驅愁
深雲樹霜辰旭旦感墜葉以驚心戍鼓津亭停征驂而
弔古扁舟共載知同入洛之張憑假日消憂豈作依劉
之王粲歲華荏苒即看別浦流澌曉色曛曛已睹青陽
應律望鄉園而不見塵飛京洛之衣懷故國以長謠目
斷鶯花之苑况復北堂草茁時倚盼于闔門返哺烏啼

尚恩勤于手線興言及此其能不顧逆旅而長盱撫棧
車而心惻也哉嗟乎洛下聲名舊侶非少鄴中遊宴為
歡幾時粟貸監河如捧毛公之檄鯖豐侯第當思考叔
之羹林下灌園仍偕吾輩機中織錦莫別經年丹花艷
日須裊汜以承觴紫鷺迎風跂遊梁之返策瞻望弗及
我勞如何

陳其年曰在唐人
中可方王子安

閒情集序

代

自國風寢微離騷繼作其辭之詼詭瑰麗幽渺凌忽以
視成周太史所陳誠有間矣然其表情之纏綿悱惻實
本於憂讒畏譏愛君憂國之思故太史公曰國風好色
而不淫小雅怨誅而不亂離騷可謂兼之自漢魏至三
唐才人疊跡綺靡之製窮極纖渺汨波討源莫不同祖
風騷亦猶之路鼗出於土鼓篆籀生於蟲書也李陽冰
稱太白之詩言多諷興馳騁屈宋為風騷之後一人子
美特變本加厲爾然其所推江湖萬古流者不越風騷

漢魏是可得其指趣矣元白艷體聯珠綴玉先後一揆
乃杜牧之獨以勸淫導媒重相詆諆何歟即牧之所自
作語多絕艷所謂勸淫導媒者毋乃躬自蹈之歟松陵
顧子茂倫夙號高才生其學上下千載於三楚兩京六
朝以迄近代之詩無不綜覽而詮衡之謂唐人之詩妙
於言情而理在其中宋人主意元人主詞去古皆遠惟
勝國季迪眉庵昌穀諸公義合風雅語兼哀艷直可嗣
響唐音稱騷人苗裔乃取三百年以來名家諸集擇其

麗而有則者撰次成編名曰閒情集當湖陸子孝山復
加參伍付之剞劂拾三閭之香草架孝穆之珊瑚馳函
遠寄余京邸每讀一過流芬送馥目眩魂搖洵冊府中
之木難火齊也已余觀古今隱逸詩人首推陶元亮乃
其閒情一賦備極帷房旖旎之致揆厥風旨正與悲士
不遇賦同一寄託蕭統嗤為白璧微瑕所以來東坡之
誚嗚呼能通乎元亮之意者斯可與讀茂倫茲集矣若
夫玉臺賸彩香奩浮藻豈足與同日而論哉

顓林集序

徐子寀之掉鞅文場名滿吳越去歲讀書桐鄉與汪子
晉賢篇章唱酬驩相得也四方賡和其詩者翕然響臻
積成卷軸將以付梓顏曰顓林而問序於余余曰子之
名顓林也何居徐子曰子不觀夫錦樹乎當夫句芒司
令和風扇物弱柳縑烟天桃暈雨凡諸卉木無不駭綠
紛紅香氣翁勃歲蕤搖曳原阜蔽虧佳人拾翠以娛懷
遊子采蘭而蕩目大造之文章極于此矣未幾而朱明

既謝秋風颯然霜露沾衣晶光旦肅起視中庭則高林
含悽隕擇滿徑如戰敗之軍旗鼓棄去裹創疾馳史士
皆烏獸散耳向之所為嬌花雜樹殢粉沾香者溘然安
往哉然自是而脆者堅潤者燥靡者勁華實斂藏結為
絢爛鴨脚楓栢經霜作花紅葉翠陰參差綺縟當之者
神寒望之者目眩此亦天下之壯觀絕采也使非秋氣
坎墮寒威砭肌之後其何以得此哉吾怪夫今之人徒
知夭桃弱柳獻媚春畦而不知凍樹丹青寒山錦繡尤

可觀而可樂也白香山有云黃夾纈林寒有葉夾纈者
唐成都錦名也昔者王公臞菴中蓋有纈林館而吾取
之名詩不亦可乎子且以為奚若余曰善哉子之言詩
進於道矣夫剝落者充實之因也閔藏者菁華之府也
不剝落則秋氣何以凝不閔藏則寒暉何以發屈宋之
騷些不至於江潭顛顛則不成子美之詩退之子瞻之
文章不至於夔州流落潮惠貶竄以後亦不能奇且變
若是也今屈宋諸君子往矣而其瑰采麗辭琅琅照耀

天地者古今之大顯林不在是哉吾與子試往觀焉窮
思維斷攀涉恐終身蹶躄而未而已也何臞菴之足云
徐子曰善請書之遂書其卷端并以示汪子

沈眉生曰鋪藻揚茶都
歸實理此豈時手能辦

南州草堂集序

往歲在茂倫齋中見徐子電發詩嘆其天才駿發有豪
宕邁往之氣因語茂倫曰此今之郭功甫也世有王荆
公定當激賞其才邀致為上客耳未幾電發客遊皖城

逶迤沂大江過采石螺磯夢探天柱峯洞穴則詩益工
已而為燕遊縱覽京都之雄聲名文物之輻輳與名公
鉅卿相過從弔荆卿投丸漸離擊筑諸故蹟則詩又益
工已復遊河朔往來齊魯間眺南池酒樓之址而悲李
杜之不可作也歷黃河泰岱明湖趵突之奇而歎東方
之壯觀極於此也則詩又益工及歸而復遊武林客治
湄令君所治湄文雅好士鳴絃之暇釣簾凭几一觴一
詠無不共之其詩之工抑且與露桃醜面風柳矜腰相

映發于西子湖心馬塍花畔而電發之遊於是乎不窮
嗚呼遊道難言之矣奇勝交加盪心駭目筆不能追情
不給賞苟非胸吞雲夢曷以賦擅驪珠則題詠之難也
昔人論用兵寧為拙速毋為巧遲維詩亦然拈楹迭唱
奚暇撚髭宮徵急宣齊矜叩鉢必多造次之華始負通
人之目則應捷之難也詩冶性靈豈拘篇什之多寡與
字句之短長今則務矜博于千言好窘人以仄韻儷青
婉白易來羔袖之嗤繁牘連章或致重疊之誚則夸多

之難也必才如電發始可以免於三者之患已乎雖然
天下奇山水無盡文士粲花之管與之角勝于引商刻
羽者亦無盡西冷六橋特電發杖屨間物耳浸假而為
天台雁宕之遊又浸假而為三湘七澤瞿唐灩澦之遊
吾知其詩之工且奇奇且富必有千百于此者寧第如
郭功甫之金山諸詠見賞于荆公已哉

華及堂詩彙序

新安之詩莫盛于汪伯玉先生伯玉當嘉隆間以文章

聲勢奔走天下士與瑯琊歷下稱鼎足百餘年來洪中
顯仕多萃汪族而文采風流則罕聞于代甚哉詩道大
而家學之難興也往歲窠之自雲間歸傳示王先生玠
右與汪子晉賢酬倡詩因言晉賢為伯玉先生近屬年
少有雋才而傾心好士桂枝片玉要當為國秀余心識
其言適有事嘉禾遂往造焉對案呶唔連辰諧賞交分
桐葉之題細舉匏尊之酌意氣驩甚時晉賢方選詩風
徵余作詩要指余告之曰楊仲弘有言取材于選效法

於唐此詩家律令也不讀選而希風漢魏是猶之濟洪流而舍稗筏也不法唐而旁及宋元是猶之厭家雞而求野鷺也晉賢首肯余言今年早秋余避地同川晉賢遠寄華及堂詩彙于時晨露泣珠新梧垂乳疾讀一過清風颯然目中英妙之姿能詩衆矣然俊情麗語絡繹奔赴鮮有及晉賢者得非深有契于仲弘之論詩而心摹手追以幾及之者耶即伯玉先生抗衡瑯琊歷下亦惟是選體唐音奉為質的而導揚之以發其菁華咀漱

金定四庫全書
卷八
之以窮其變化今晉賢齒方逾冠鏃礪括羽修綆汲深
益進于古人舉伯玉之弧螯而重建之以角中原之壇
坵愚雖老猶願執爨以為之前驅也

梁大司農詩集序

唐貫休云乾坤有清氣散入詩人脾而歸太僕又言詩
文者天地之元氣清氣之與元氣有以異乎曰有異清
氣如遊澄潭靜渚之間淪漪映空蔚藍同色盪濯者爭
就焉然而潦盡霜清不免有易涸之憂元氣如葭塢陽

回勾芒律動山川俄焉增絢草木為之改觀一任紅英
紫艷白萼綠跗紛紛籍籍隨物變色而莫知化工之所
由然是故得清氣者為勞臣志士之幽情為羈人思婦
之苦語哀怨淒切或至如候蟲之鳴與寒蟬相應若夫
得元氣者西清東觀之間振其步武明堂清廟之上戛
其聲音煌煌乎山龍藻火之采爛焉琅琅乎璆璜衝牙
之響發焉惟其受之于天者全故凡音不得與之競工
拙也三十年來海內之以名公鉅卿主持風雅者南為

芝麓龔先生北為蒼巖梁先生二先生著作近懸秦市
遠走雞林梁先生在今則歸然魯靈光也先生之詩未
窺全豹茂倫山子梓行其集始得受而卒業焉筋力成
就在高岑王孟間七言近體兼撮歷下之勝有正容劇
切之志而不改其和平有揆天藻麗之辭而不流于靡
蕩蓋先生家承世閥學有淵源一門羣從接武華要太
行溱沔山川秀杰之氣盡萃于一氏以故擅材弘富抽
發不窮愚所謂得元氣之全者非先生其誰耶抑又聞

先生退食之餘即焚香靜坐蠹帙遺編窮搜不輟橫經
藉史諷詠忘勞兼之汲引文流無遺韋布如登玉山鮮
不收之瓊玖如過馬肆多特顧之驂騑通懷樂善于今
無兩斯又先生得天之厚所以于已有文章著述之功
于物無訾尤跋扈之累者也不佞齡菰蘆下士屈首窮
經未為入洛之遊猥辱逢人之問因是集劄劄告成僭
綴蕪辭用塵卷首若夫先生臺閣鴻謨南宮偉畧則載
在史館非鯁生末簡揚扝可既故無及焉

汪周士詩彙序

韭溪之西古梧桐鄉有寓公焉為休陽汪仲子周士與
叔子晉賢以詩文鳴吳越間四方之聞風造請者戶屨
相錯琴樽在左圖史在右從容獻酬無間晨夕談者以
為顧氏玉山草堂不是過也周士之詩憶癸丑冬案之
攜以示余見其清舉韶令歎為時賢第一流今年冬往
過其廬周士出一編相質清舉者加以精工矣韶令者
進而深穩矣浮聲切響無不合度名章迴句時獲驪珠

余方欣賞不置禹慶青士起曰周士才信美抑詩道有
進此者乎余逡巡却席曰齡鄙人也何敢云知詩雖然
嘗流覽古今詩之盛衰而得其說矣夫古之作者纂緒
造端淪瀾百變而其中必有根柢焉上之補裨風化下
之陶寫性情如伯玉感遇三十八首伯玉詩之根柢也
太白古風五十九首太白詩之根柢也子美北征詠懷
前後出塞及新安吏以下諸篇子美詩之根柢也退之
南山秋懷退之詩之根柢也樂天續古詩秦中吟數十

篇樂天詩之根柢也唐人論詩每云工于五言蓋以五
言工則不必問其餘是五言古為諸體之根柢而五言
古之根柢安在乎亦曰求之三百篇離騷以及昭明之
選而已矣自近體盛行便于應酬干謁而世之辭人率
以之代羔雁充筐篚于是五言古幾廢即披英散馥排
比極工不過儷青妃白流連景光已爾于六義之道安
取乎豈惟今人獻吉于鱗詩家之雄伯也其論五言古
則愚有猜焉獻吉之言曰李杜大家不越唐調不敢目

以漢魏何況三百于鱗因之云唐無五言古詩而有其
古詩陳子昂以其古詩為古詩弗取也夫三百不得不
變為屈宋屈宋不得不變為蘇李蘇李不得不變為曹
劉曹劉不得不變為齊梁諸子齊梁不得不變為神龍
景雲以至開元天寶其間格調雖殊所以補裨風化陶
寫性情者源流則一今必專祖漢魏以時代限之而謂
初盛之詩去古皆遠非通論也近世為五言古者多宗
選然剽擬膚澤幾于像設不靈或遂概選體而嗤薄之

子美云熟精文選理精其理者必有神明變化之功焉而豈徒掇拾其辭句規撫其步武哉學者誠取子美之所得深思之因以求漢魏離騷因以求三百則五言之根柢在是而三唐風軌皆可同條而共貫奚至如二李之論判為淄澠乎今大江南北以詩名者秋嶽蘧人顧菴大可冰修定九珩右無殊十數公周士皆與往來鳴和鈍翁蛟門又君家嗣宗試取鄙言質之未知諸公以為何如也

高漢思曰如此論
詩可謂探源星宿

鈕貞父詩集序

記有云先祖無美而稱之是誣也有善而弗知不明知
而弗傳不仁蓋古之君子其不敢沒其親如是也手澤
存焉書策不敢褻口澤在焉楛棬不忍遺而況于所撰
著之文章乎吾嘗習譜牒之學見吳中先賢之嘉言懿
行往往筆而志之及問其後裔則懵然不省甚且舉其
祖先之遺集而飽蟬魚易餅餌斯其罪比于粥及祭器

斬及丘木者不啻倍之也貞父先生生正嘉盛時隱于醫以詩遊孫太初黃五嶽王履吉諸公間然其名不甚著愚于安期前輩邑乘中得其詩數首始亟稱之復為作傳今其四世孫斯來以五浮山人集示余則衆體皆備出入魏晉三唐使先生生于今世必當鼓吹風雅有雕龍繡虎之目當時罕所稱道豈非前人敦素履薄浮名不及汲于標榜結納故耶先生之詩固可傳然非有哲盾藏弃之虔表章之切亦安知不與陳根委翳共銷

滅于寒烟夕燒中也由是而觀古名賢之制作其晦而不彰彰而不行行而不遠者蓋不可勝數也然則後死者之責豈不重哉豈不重哉

汪季青詩彙序

余之過華及堂也二稔于茲矣維時賓從如雲酬應紛沓周士晉賢與青士數子或拈韻長吟或揮盃滿引斗斜燈炮諧談如沸季青獨危坐其旁岸然有手弄白日頂摩青穹之意余固已心異之今春晤鈍翁先生先生

語余曰子見季青詩乎殆天才也適季青以近作貽余
點定余受而丹鉛之其光氣熊熊然其音節淵淵然其
興會標舉又復軒軒然浩浩然蓋杼軸本之少陵而槎
枒杲兀之致得之山谷放翁居多以視二昆之清文麗
藻又別開一疆索仲智火攻得無直逼伯仁耶鈍翁稱
為天才信不虛已李贊皇有言文人以才為命婦人以
色為命越女之妖楚妃之艷雖粗服亂頭嫣然一笑而
陽城下蔡皆迷惑豈區區在裙裾粉澤間耶色之不足

而後矜梳掃以為姿恃鉛華以為媚抑末矣是故才者造物之美器不輕畀人其得之者如琪枝瑶草舉世稱瑞馬豫章出地已欲干霄驥子試塗便齊飛兔古今文士其得之天授與得之人力者生死工拙之分相去奚啻尋丈哉今季青年方弱耳既負絕人之才而又性耽烟霞目飽紺素一門之內嗶嗶和鳴從此汎學海陟文山舉修步于長塗窮壯觀于絕景余請以茲編為嚆矢焉

董太史豫遊草序

董子方南省親歸里得見其燕臺詩思入風雲詞諧金石侍從宜春旣發挾天之藻獻酬羣彥復多肆好之風竊歎臺閣體固應如是今夏鼓楫為豫章之遊歸而以一編示余又皆哀怨抑揚之作蓋調近噍殺多羽聲焉或問董子以終賈之年射策甲科讀中秘書翱翔天路此豈不得志于時者奈何為此幽思窈眇之音乎余曰董子仁孝人也觀其采蘭眷戀以白華之潔行戒養南

咳非有意為汗漫游也一旦以甘毳之不給而出遠涉
江湖冒嗔鼉獺二孤之懸流馬當之奇嶮昔人以比太
行呂梁左蠡瀾漫分風上下過之者能無垂堂之戒乎
哉况軍興孔棘羽檄交馳荆棘載塗蜚鴻滿野宗袞焦
思旅人蒿目遥睇江山皆增怊悵矣弔孺子之墟墓式
柴桑之故廬又能無畢然高望而遠志哉宜其見之詠
歌者恫乎以悲悄乎以慄哀氣感而羽聲多也昔人稱
張燕公為大手筆自居岳陽詩更悽惋蓋情因境遷非

可一致若夫羈旅之作多激楚山林之音多愁寂此豈所以擬吾董子耶

宗定九全集序

嘗讀淵明詩云養真衡茆下庶以善自名而昭明之序其集亦曰語懷抱則曠而且真蓋古人文章無不以真得傳者有真感傷而後有阮公正字之詩有真節概而後有工部吏部之詩有真豪宕而後有青蓮之詩有真閒適而後有左司香山之詩乃後之作者見諸公之成

家在是也遂相率而撫倣之以為名高不情之歌哭隨
衆之裒彌縱極嘈噴無關性靈何以感情激聽叶鐘律
而壯風雲也子美云別裁偽體親風雅今之詩文其為
偽體也多矣能無待于別之裁之也乎淮南宗子定九
夙以才藻擅場余嘗取其前後集分體詮次之佩實銜
華兼工衆制人歎定九之才何善變如是余請一言蔽
之曰真而已夫矯訛翻淺還宗經誥此劉勰之所尚也
補衲拘攣盡文為甚此鍾嶸之所譏也定九博極羣書

而學有原本絀幅道義鈞貫經史優柔浸潤灑然出之
當其少年盛氣搖筆飛揚寄懷香草追風勺藥之篇託
興佳人侔麗靈均之作為六朝則真六朝也已乃漸謝
鉛華舉陳胸臆開元大歷之遺響奔命行間杜陵白傅
之偏師直摩前壘為三唐則真三唐也邗關故金粉地
定九厭而逃之東原汎艇無謝花津高柳垂檐何殊粟
里任東鄰之撲棗看西舍之通池以言丘樊則真丘樊
也定九交滿天下韋布搢紳久要如一雖孝廉之船時

覓郡教馬軍之酒走送花間而視之泊如以言臭味則
真臭味也有定九之真詩文而世之矜燕石綴駢枝規
規挾其叢殘玉屑以為至寶之不匱者咸擺指退矣有
定九之真丘樊真臭味而世之高談黃綺猶求潤于冷
炙殘盃好結雷陳曾莫問夫練裙葛帔者不亦皇然汗
下已乎或者曰以定九之才使得早遇于時經國大業
當與海內共見之今顧使為逃虛寂寞之子能不為世
道惜雖然定九而遇必將直廬視草日頰首東華軟紅

中安得有此真詩文之樂與真臭味真丘樊之樂從容
偃息于謝墅庾村之間軒渠拄策曠然怡情而適志也
哉然則天之待定九不為不厚余又安庸以天之厚定
九者而反為之咨嗟太息也

朱致一曰真字可為
救時鍼砭豈獨詩文

愚谷詩彙序

三十年來士多好言隱逸其所為隱逸之詩類以吳宮
花草晉代衣冠託之悲悼而余弗謂善蓋其音響是而

性情非也及讀肺髮集與白石樵唱則神骨凜然頓覺
風雨晦冥山鬼夜泣詩之能感人如是耶旨哉范蔚宗
之論逸民以親魚鳥樂林泉歸之性分所至非可矯飾
為也鹿城吳中奧區冠蓋之盛往時嘗當大藩今乃萃
於東海一氏疑山川靈秀發泄過多而吾友季重先生
獨以潛確勿耀稱陳留諸阮安可無嗣宗高致提唱其
間耶季重詩筋力成就都得之少陵而弔故宮之禾黍
感仙仗於崆峒竇從深情至性激射而出故能使讀之

者凄然愴然留連往復而不能自己吾嘗謂少陵當時若無靈武回鑿之事其詩不知作何悲咽今以季重觀之其引義陳辭恐亦不過爾爾而說者定謂今人不如古人豈非目論耶季重淹洽史籍嘗輯三百年隱士人為之傳斯可得其志意之所存然隱未易言也其人非有深情至性超然塵垢之表而徒任放為名高則山澤之臞行吟帶索者皆廁其林矣甚且如田遊巖盧藏用輩以為仕宦之捷徑矣余亦有志于隱而深病充隱之

徒為煙霞泉石所笑也故因序季重詩而并及之

寒山集序

寒山集者愚菴叟選啟禎以來之詩專取幽清澹遠掃盡俗葷者倣元次山篋中集之例人不別仕隱品不分通介起曹學佺訖徐白得二十人詩三百首綴為一集時省覽焉客有見而問者曰此諸君子之詩乃世所嗤鍾譚體為鬼趣為兵徵亡國之音也夫子何取乎爾叟笑曰不然此樂所謂羽聲者也傳曰大不踰宮細不過

羽又曰絲聲哀哀以立廉宮絃八十一絲羽絃四十八
絲其清濁輕重大小懸矣以絲聲操羽調則沈伏幼眇
失其和平此樂記所謂急微噍殺之音子產所謂中聲
以降五降之後不容彈矣也然此非人之過也聲音
之理通乎世運感乎性情譬如焚輪扶搖之風起于青
蘋之末俄而調調而刁刁而琴琴小和大和萬竅怒號
此孰使之然耶諸君子生濡首之時值焚巢之遇則觸
物而含悽懷清而激響怨而怒哀而傷固其宜也且而

不聞十二律旋相為宮之說乎以宮徵商羽角隔八相生之序言之則十二管皆可為宮十二管之宮皆可應以羽先王之不能廢羽聲而成八音也猶襄人不能舍醯醢鹽梅而濟五味也五子之歌必錄于夏書黍離之詠不刪于王國皆此物此志也今諸君子之言具在音節雖殊皆與唐人相上下澹以永者昭文之鼓琴也燥以揚者師曠之清徵也鏗鏘感動者趙簡子之鈞天也噌吰鐘磬者周景王之無射魏獻子之歌鍾也羽聲而

近中聲不戾乎變風變雅卽尼父復出刪詩亦將取焉
而安得以木客之悲吟幽獨君之冥語漫比而訾斥之
哉左太冲云山水有清音何必絲與竹夫清音未有不
諧乎絲竹者也山月高寒木葉欲脫吾將手此一編蕤
水沈烹蒙茁正容盥手而誦之必當山鳴谷應潛蚪舞
而哀猿啼也


竹笑軒詩集序

自萬曆之季海內尸祝鍾譚人挾詩歸一筴其教以幽

深孤峭為宗直取性靈不使故實一時附和之者往往入于僻澀無理以俚率為清真以晦蒙為奧異誠如說者所譏然幽深孤峭唐人名家多有此體譬諸屠門大嚼後啜蒙頂紫茁一瓷無不神清氣滌此種風味亦何可少今人以詩歸流弊羣然集矢于竟陵而并廢唐人之幽深孤峭于是偽王李之餘波宿燼復出而乘權于世豈非持論者矯枉而失其平之過耶介白詩入門亦自鍾譚而能不熏染其流弊吾嘗見其平時手少陵集

不置又游泳出沒於孟東野賈闌仙司空表聖陸魯望
皮襲美諸家皆咀其膏液脫其渣滓以故其詩幽而不
晦清而不貧孤而不過于削澹而不失于枯魚山天梵
響夏清霄庾嶺寒梅香飛夜月讀介白詩亦作如是觀
可矣介白為人磊砢自異隋岸不為俗所喜蓋馮敬通
梁鴻趙壹一流山居之後不異頭陀鐘夕香朝意頗自
適猶之淵明隱逸自出天性非盡以不臣劉裕為高也
怛化未幾廬井蕩然崖枯木落山鬼夜號其人看字欲

出梅村弔趙凡夫詩古佛為隣佑名山作子孫其殆為
介白詠歟余往見介白有太湖落日賦為陳給事卧子
所激賞今集中無之又山居以前詩多未見疑散佚者
多然此已足傳矣適與崑山葉子九來謀刻其遺集泚
筆書此款款久之



愚菴小集卷八